



藝術典第五百三十三卷

醫部醫術名流列傳十

明四 李奎

李蘭泉

按鄞縣志李奎字石梁少負氣尚俠避讎亡匿湖海間十餘年始歸更折節讀書精於醫洞究內外經心揣手追盡得其妙善起人病疾他手所不治者常得生有誤吞指爪喉哽幾殆奎令剪人指爪燒灰服之立愈疑其故方奎曰不然此內經所謂衰之以屬者也聞者嘆服好古金石及名人墨蹟植花草滿其所居年八十三卒先是嘗有李蘭泉者以醫名世奎之術蓋得之於蘭泉云蘭泉所著醫說未及刊布其後學徐國麟至今寶藏之

張暉

張翰

按海鹽縣志張暉中所人能醫治傷寒有起死回生之功子翰繼其業感寒疾者藥一服而愈時稱爲張一帖云

賀岳

按海鹽縣志賀岳字汝瞻初因病盡購岐黃書誦之且從四方國手講究遂精其術病者圭勺霜口卽奏功郡邑藩臬皆延致之加以賓禮所著明醫會要醫經大旨診脈家寶藥性準繩諸書醫者宗之

張靈

談寵

按海鹽縣志張靈號芝田談寵號元谷竝精小兒醫先後著名嘉隆間子孫並嗣其業

錢同文

按海鹽縣志錢同文字養真精岐黃術遇危篤疾投劑立愈乞療者以先後爲序不論富貴也貧者不能具筏附每出筒中蓄入咀咬不以告有荷擔販鹽者家無斗粟鹽爲捕所奪嘔血數升匍匐求治同文潛以白金半錠雜藥中其人敢函得金以爲誤也同文曰我安得有金卽遺汝必明告汝矣其人得金喜飲藥立愈其陰行善多類此敝衣徒步不憚數十里所至惟食菜羹恐以口腹殘物命也壽七十餘乃終

鮑大才

按海鹽縣志鮑大才父南湖精醫自蘭溪來歷西關外大才世其業事母孝母病日跪榻前飲食居恆曲意承勸所施圭勺神效不期報郡邑大夫俱異數待之舉飲賓年六十九卒以從子遇明啟明爲子皆無子遇妻項氏啟妻陸氏並年少守節終身

韓德基

按海鹽縣志韓德基字卓甫永樂間御醫履祥裔孫也世爲潑人少孤讀書解大意長精於醫決人生死多奇驗見貧者與其貴藥不求酬出有所得必獻之於母或分與親知舉祖母之喪營辦皆竭己力不以責諸父諸弟孝友好義其天性也卒年僅三十九無子以弟之子爲後

石涵玉

按海鹽縣志石涵玉字啟泰治痘疹奇效劉氏莊患痘者二十人涵玉視之曰某弗藥愈某某日死以筆記之一一不爽豐山兄弟三人共一子痘不起面青腹痛涵玉憂之夜夢大士曰何不用白芍涵玉躍然蓋白芍能於土中瀉木面青腹痛木乘土也如法治之立效西郊沈氏子方見痘延視辭曰此終不能有功他醫療之過其門聞張樂則以痘愈酬醫也固邀入席呼子出揖以愧之涵玉曰

明年今日必患痢終難救衆不悅如期果一女患痘眼白色面紅如灑脂涵玉曰內潰證也取紙礮一令其父然女耳畔如雷大驚面部痘蟲起數劑差衆奇問之曰內潰以通竅爲主驚則心竅開痘不內伏何足異其治法多類此中歲長齋放生建靈瑞禪院以安僧衆買地施棺以瘞無力葬殮者凡三區名廣孝阡蓋樂道好善不第以藝術傳者子楷邑諸生益精先業北遊都下名動公卿所著有傷寒五法證治百問新方八法行於世

盛賜祿

按海鹽縣志盛賜祿幼遊蘭溪遇方士授岐黃術賣藥城市貧者施不責償捐貲助修瓊城橋佐沈龍宇完婚娶人多義之年八十五盡以家財分散親族而卒

吳中允

按石門縣志吳中允字養素幼失母砥礪志操敦篤友誼兄弟中有欲分財析產者輒推與之家徒壁立奉養未嘗少缺精醫術濟人凡貧富咸親視診病痊不責其酬鄉黨以此推重

祝文琳

按石門縣志祝文琳字長聲庠生精岐黃家言見地高頗能洞垣決隱時遊騁文墨著有黑將軍傳芋芳先生記詠謫可喜亦善作詩子翼皇年少輩英庠序早卒因惻惻以沒

孫鈍 皇甫泰

按錢塘縣志孫鈍字公銳遇異人授卻老方九十童顏醫傾海內所著有試效集成書按脈用藥足齊古人又有皇甫泰者與之齊名人稱孫皇云

錢寶

按錢塘縣志錢寶以小兒醫嘉靖初徵授御醫侍太子疾有效陞右通政

俞橋

按海鹽縣志俞橋少業儒究心理學兼精岐黃術嘉靖中以名醫被徵累官太醫院判橋於方書無所不晰更博詢諸名家得河間潔古東垣末刻諸稿及古今祕方斟酌損益之以治病無不奇驗居京師恥事權貴而貧家延之必盡心療治以故名愈藉藉而家日窘士大夫雅重之著醫學大原一書蒐輯樞素以下諸家有關證脈者次以賦括令業醫之士診脈製方有所考證焉

嚴元

按杭州府志嚴元字宗仁少業儒不售從父籽謁選京師屬有詔選醫士元故精岐黃家言就試禮部隸籍太醫院嘉靖中預修袖珍諸方錄賜銀幣甚渥上幸承天有旨命元扈從嘗宣召診視及視東宮後宮疾輒效賜金綺至撤御前酒饌以優寵之秩滿授御醫會司藥署員缺旨特用元爲人所忌中蜚語落職元事親以孝稱其爲醫熟察標本陰陽脉絡皆極洞暢以子大紀貴封部郎贈方伯

過龍

按蘇州府志過龍字雲從吳縣人丰神超逸隱於醫著鍼灸要覽十四經發揮茶經各一卷時與祝京兆文待詔遊生平不蓄不畜所需自足自號十足道人年九十三卒文徵明有十足道人傳

金綬

按懷遠縣志金綬幼業儒兼習養生之術尤精於醫濠壽之間待之全活者甚衆本府饒都伯得奇疾遍求醫治不效張黃門翼翔薦綬於饒延見診視三投湯劑而沉疴豁然饒喜榮以冠帶隆慶初年與鄉飲卒年八十七

葉文齡

按仁和縣志葉文齡字德徵幼業儒不遂去學醫禮部屢試優等例授冠帶供職於聖濟殿陞太醫院吏目甲午召診保和有功陞御醫忽被宣召御書忠愛額於堂庚子再召陞院判後因母老乞終養遂致仕所著有醫藥統旨行於世

張榮

按如皋縣志張榮字伯仁常山人移家如皋少精診家學人以疾請無早夜寒暑雨雪無不赴者投以劑輒奇效至報有無不問也嘉靖己未邑有倭寇崇陽劉景韶以兵使者提兵境上挾以自從會軍中大疫榮起者千餘人隆慶末下邳有治河之役大興卒徒皋人負鍾者千二百而疫死者過半榮自請往治焉至則夫役俱就茅蓬下臥一一療之皆得生還不費縣官一錢也好施予甯人有謁者無不應往往折券棄責卒之日家無餘貲子孫今爲皋人

曹察齋

按如皋縣志曹察齋精岐黃之術一日行途中聞有婦臨蓐者作楚特甚曹拾地上敗葉命煎湯服

之卽下人叩其故曹曰醫者意也我取其敗葉落耳衆服其神

賣藥人

按如皋縣志明萬曆甲寅夏有賣藥人挑藥籠至市中俄有兩人肩一病者求醫病者遍身皆刀斧痕頭項尤甚取其頭置膝上以藥塗之安上視聽如故兩人復肩而去酬之以錢不受觀者如堵未幾遽逝不知所之惜未叩其姓氏

沈道輝

按泰州志沈道輝泰州人善岐黃之業如皋縣江寧鄉有石氏女子夢與神接神黑而髯腹漸膨脝家人咸共驚怪往謁道輝道輝診之曰此鬼胎也以藥下之得二肉塊剖視外黑而中白如脂

沈汝孝

錢惟邦 盧似立

按杭州府志沈汝孝字太國父文奎習岐黃居富陽之坊郭里術不甚售及汝孝童年知醫所投輒效萬曆中周孝廉羔計偕過關閼疾衆醫不能愈太國獨以三稜莖朮等藥投三十劑而愈羔仲子兆斗以勞鬱致病幾不救杭醫錢惟邦曰周郎病勞懣鬱極而尸蹶也下之則生矣會醫士盧似立

過寓切其脈撫掌笑曰正所爲陽脈下逐陰脈上爭胃氣閉而不通故脈亂形蹇以陽入陰支蘭藏者生是也不可驟攻須七日少間三七日而愈太國聞之躍醜以湯液煮以齊和病瘥一如二君言蓋武林醫者錢能攻盧善守而太國則非攻非守適於二君之中者三人遂稱鼎足焉年八十卒子孫能世其業

唐繼山

按會稽縣志唐繼山以字行萬曆年間人住安寧坊少喜讀書長而習醫以溫補爲事多奇效尤能以脈理決生死於數年前人至今稱之有脈訣行世

李尙元

按江寧府志李尙元字仰春以治傷寒名家焦太史嘗贈以文略云自古論病惟傷寒最爲難療表裏虛實稍不審輒不可救尙元有三勝焉每用藥言某時當得睡某時當得下時刻皆應一也有一兒病誤服補劑幾殆尙元所用獨異羣咻之不爲動卒以奏功嘗曰倉公言吾以脈法治而愈二也龐安常治傷寒有名傳稱其樂義耐事如慈母而有恒尙元爲人似之三也其爲名公推服如此子

言曾孫鍾懋時遇皆世其業有聲

王有禮 瞿介福

按嘉興府志王有禮休寧人嘉興邑庠生本姓沈字三五居鴛鴦湖上精軒岐術善治傷寒有尊生內編十卷葉向高序尊生外編八卷岳元聲序皆行世 按靖江縣志瞿介福其初常熟人後徙靖以醫名萬曆時邑中瘟疫大作介福施濟所活甚衆

鄒志變

按靖江縣志鄒志變字鳴韶其先丹陽人少業儒一再試不售輒棄去怡情墳典於書無所不窺爲人朴雅則古稱先嚴於取予一介不苟中年精醫術嘗羅遠古倉扁以及近代劉李諸家之言著脈辨正義五卷言言理要與素問靈難相發明邑人朱家拭爲之傳

張文達

按金壇縣志張文達字振凡善醫尤工於胎產著保生集要一卷提學副使馮序之以行萬曆四十年授太醫院官子祥元字元如亦以工軒岐術稱授太醫院吏目

湯文

按金壇縣志湯文字涵春生嘉靖中家貧晝耕夜讀手不釋卷行田時倦則臥畦畔苦吟或負擔展書擔頭誦之時以儒業見一不售卽從學醫道殫究原本辨陰陽應象六節藏象之祕投劑無不效者常曰士遇則爲良相不遇則爲良醫皆以燮理陰陽爲道耳若使診視諸證莫辨二氣互勝之理疾何由愈王肯堂以爲名言盛行於世以不受謝僅有田四十餘畝分其半與弟豐膳奉父不以煩其弟也萬曆初授太醫院吏目子宗元別有傳仲子宗禹字養原亦以醫名切脈對藥有別見能起危證而生之時獲豐資遇人有所急悉爲施予散去萬曆壬子授太醫院吏目舉鄉飲賓年八十四卒

徐春甫

按祁門縣志徐春甫字汝元汪宦門人醫家書無所不窺著有古今醫統醫學捷徑居京邸求醫甚衆卽貴顯者不能旦夕致授太醫院官

施夢暘

按吳縣志施夢陽字應章其先自浙徙吳嘉靖丁巳補吳庠生屢試不售遂習岐黃術洞悉祕奧得註籍醫院萬曆七年奉召入部承事十五年吳中歲凶捐藥資設局海紅坊巷賑濟自丁亥至壬辰六月間水旱頻禱全活無算今海弘禪寺卽濟貧故址也

左維垣 釋普照

按涇縣志左維垣訓科震道之後家傳醫學尤精傷寒治法常以濟世爲念往往有破棺而出者酬金不拜也萬曆間授太醫院醫官 按鎮江府志釋普照萬曆末至金壇不知其所自來精於醫多祕方治瘡瘍湯火諸患立有神效不責報於人年八十餘卒

王肯堂

按明外史吳傑傳士大夫以醫名者有王肯堂字宇泰金壇人萬曆中舉進士選庶吉士授檢討以京察貶官終福建叅政肯堂博極羣書兼通醫學所著證治準繩爲醫家所宗 按野史王樵傳樵子肯堂字宇泰舉萬曆十七年進士選庶吉士授檢討博覽羣籍聲著館閣倭寇朝鮮疏陳十議願假御史銜練兵海上疏留中因引疾歸旋遇京察以浮躁論調家居久之吏部侍郎楊時喬薦補

南京行人司副終福建叅政肯堂平生無他嗜獨好著書尤精於醫所著證治準繩該博精粹世競傳之

陶華

按浙江通志陶華字尙文餘杭人治病有奇效一人患病因食羊肉涉水結於胸中其門人請曰此病下之不能吐之不出當用何法陶曰宣石砒一錢門人未之信也乃以他藥試之不效卒依華言一服而吐遂愈門人問之曰砒性殺人何能治病陶曰羊血大能解砒毒羊肉得砒而吐而砒得羊肉則不能殺人是以其可愈後來省郡治傷寒一服卽愈神效莫測名動一時然非重賂莫能致論者以是少之所著大書曰瑣言曰家祕曰殺車槌法曰截江網曰一提金曰明理續論仲景以後一人而已

秦昌遇

按松江府志秦昌遇字景明上海人天資警敏少善病因遂學醫治嬰兒疾稱神已而徧通方脈不
由師授妙悟入微常行村落見婦人淅米使從者挑怒之婦人忿詬昌遇語其家人曰若婦痘且發

當不治吾激其盛氣使毒發肝部耳目下春時應見於某處吾且止爲汝活之及暮如其言乞藥而愈青浦林氏子年方壯昌遇視之曰明年必病療三歲死明年疾作踰兩春竟死昌遇所剋時日皆不爽其或病至沈篤時張口瞑目昌遇投劑能立起名動四方往來無靈暑然未嘗自多嘗謂法當死者雖廬扁不能爲苟有生理勿自我死之可矣爲人瀟灑自適預知死期年六十餘卒所著大方幼科痘疹折衷行於世

徐延賞

按松江府志徐延賞字元識上海人好養生家言因精岐黃術屢起沈疴常熟令楊鼎熙病月餘徧求醫弗效延賞決爲痰疾以三劑起之吳淞朱總戎文達素無恙一日忽覺神思有異晚而歌哭不節飛騎邀視延賞曰此陰火乘肝晚動也予平劑遂復懸壺滬濱間爭禮致之延賞以供具過設多奉清齋又作戒殺文以勸常授太醫院御醫董文敏其昌雅重之贈以詩曰藥倩韓康賣門容尙子過五茸安豹隱萬里弄鷗波有子霑恩能世其業

華摘藻

按無錫縣志華搗藻字麗涵以諸生去爲醫得傳於雲間李中梓遂以世其業

郁光始

張逸

按嘉善縣志郁光始字涵春從兄涵真調元稱吾家華佗也善醫不計藥費貧則施之萬曆末嬰孩險證投劑立愈痘疹察色尤精一見而決子國英亦以痘疹名疾有疑難必延診飲劑如神授焉張逸字泰庵通素問脈訣綱目初行痘疹繼精大方三吳巨室拏舟相迎善撫琴工畫藥餌之外能養人性情稱醫家逸品

劉覽

金元德

按嘉善縣志劉覽字月梧父性良號仰松精醫術外科授太醫院吏目覽事親孝益精其業雲間孝廉陸慶紹母奇疾治之神效饋五百金卻之董其昌陳繼儒延譽授太醫院御醫金元德字鍾梧亦善醫授太醫院吏目

張萬春

丁鳳梧

按嘉善縣志張萬春字復泉治嬰孩神效里有孺子啼張入室灌藥數匙卽歡笑矣壽九十六授

冠帶醫官丁鳳梧字敬山精外科無名腫毒十八種咽喉疑難立解其先世受異人方絕非人間伎倆壽七十二授太醫院吏目張丁子孫林立皆能得其傳人稱爲五世醫云

潘師正

按嘉善縣志潘師正字斐伯與君永同術少從劉念臺黃石齋遊博通陰陽燥濕之學醫學濟人多奇中性耿介與魏庶常交最深子遵武庠生亦善醫能世其業

吳中秀

按松江府志吳中秀字端所工岐黃之學高仲陽三年不寐諸醫以爲虛中秀按其脈皆洪曰此膈上頑痰也以瓜蒂散吐之而愈李某素無疾偶過中秀家爲診視之遽問君有子乎對曰有子十歲中秀曰幸矣君明年某時患瘍非湯石所療至期果驗其名與秦昌遇景明相伯仲六十年間所全活人不可勝紀少有至性侍母疾衣不解帶躬親浣濯其兄嘗從索十金中秀檢囊中得數十金盡與之其子女六人悉爲之婚嫁有姊年八十中秀亦篤老矣猶謹視起居故世尤稱其孝友生平好聚書有數萬卷構天香閣藏之董文敏陳徵君時過從焉有子懋謙能讀父書中秀所著有醫林統